



Овс мув нэңат кимет уйтантопса



Хор: Зоя Курьямова

Там лапатан «Россия» нэмпи национальной центрэн Овс мув нэңат ураңан кимет форум рупитас. Тамац уйтантопса хулам тал кут йи пуш верда. Мет олаң отал Хон Петра вошан манас. Тампуш Овс мув сыд муват элты ёхтаман нэңат Хон мувев волаң вошан ияха актацсат.

Хольмаң педа нийд Овс мув Щёпр па Халэват Пелак регион элты, ловаталан нийдсот шимлаң рут мир нэ уйтантопсая ёхтыдыйс. Дув кутэдан леккарат, арсыр тахаятан рупитты куцайт, няврэмат уталтыты, ёра рупата туты па вуды хотан касадман яңхты нэңат усат. Там йисан Тихоокеанской, Северной па Балтийской царсатан мув сыдлув шавиман рупитты ёх нэңдал там уйтантопсая ищи вохидысайт.

Олаңмет форум манам порайн, шимлаң мир хоятата мосты па улапсаев кентат верты арсыр ялап нётапса верат рупатая вуйман усат. Хоятат яммалтыты, няврэмат уталтаты па вуды хотатан касадман яңхты нэңат элты потар манас.

Уйтантопсайн потартса, хоты елпи рупатая вуйм нётапсайт рупитлат, муй щирэн елды манти верат ям щира дарпидасат па маты верат холна туңматты мослат. Ты ёхтаман нэңат ещалт Янна Архиповна Кондыгина вуды хотан улты уласайд элты потар тус. Щит элты, елды этты газет номеран луңталц.

«Овс мув ямашак лэщатты вер элты потар тутэван, иса номасан тайты мосал – щит, мет олңа, йис пора элты щита улты рут мир хоятат. Маты отат шоши муведан уллат па ищки, ерт, пелңа кутан касадман па

велпасламан рупитлат. Катра пора улапсаел па лув рут мир ясцел ин там хатлат унты шависэд па елды тулэл.

Еңта пасан суратан номпса понам потрат, тордыя закон щирэн нэпека лэщатты мослат. Щи порайн, хоят рупата хуват сайламан улты питад па верты верал ям педа ямпсыена елды нёхдал.

Нумастрэман, там кимет форуман, хоят улапса яммалтыты ураңан ар партапса ястаса, маты отат щаха рупатая вулайт», – Евразийской Совет нэңат форум куца нэ па сенатор Галина Карелова ястас.

Там уйтантопсаев Хон мувев ловатан арсыр рут хоятат ияха пилаңа улты Тада постаман ул. Тал сыс холна ар тахаятан щи тада постаман уйтантопсайт лэщатлайт па верты питлайт.

Зоя Курьямова ханшам потар

Елды уталтыты манти ураңан

Хон мувев хуват ашкулда етшам юпийн, рупата педа уталтыты хотата нэпекат китты пора ёхтас. Техникумат па колледжат хося уталтыты утситы няврэмат кеша ох ант сохаптаты 880 сёрас уталтыты таха лэсятман ул, университетатан – 620 сёрас симась места.

Тампуш Пулңават вошан Ямальской многопрофильной колледжан 755 уталтыты таха, Лапатнаңк вош филиалан – 248 места лэсятман ул. Муй хорпи рупата педа уталтыты тахайт уллат, колледж сайт хося ванты рахал.

Там талан ялап сират этсат. Мосты нэпекат «Поступление в вуз онлайн» «Госуслуги» портал па почта хуват китты рахал, сьлта па уталтыты манти воша ёша-кура туты. Уталтыты хот сайта нэпекат юцтаты вер пуңда вуса.

Унт дор тыдась хулмет па лапатмет хаталңан «машья хатлата» луңтасты питлаңан. Си порайн, уталтыты партапса нэпек эттыйн, китам нэпекат ёхлы вуты па уталтыты кашащты китам нэпек пелатты ант рахты питад.

Молты инсясапсайт ки тайлаты приёмной кампания тахайн лэрапты рахал па горячей линия – 8 (800) 444-51-15 телефон хуват инсясты.

Альбина Тырлина ханшам потар



Хор: Альбина Тырлина

Кадаңата портун понты пора ёхтас



Хор: Иван Сандрин

Хащам дапат шутцаты хатда-тан «Горковское» сельскохозяйственной предприятие хоца кадаң тащат луңатты питсайт па ши тумпийн портунан донцдайт. Ши кеша нэман рупитты хоятат Лорвош район филиал «Окружной центр ветеринарии» элты ёхатсат. Вой яммалтыты ёх щита яңкем хатл сус няд кадаң тащ пидан рупитты питдат.

«Горковское» сельскохозяйственной предприятие хоца няд кадаң тащ ул. Аратад хут щёрс кем кадаң шавиман тайдайт. Ин, товийн сэма питам суюват пидан холна аршак питал. Кашң кадаң луңатты па сибирской язва муш элты хурыман, портунан понты мосал. Ши тумпийн ин кадаң пада «бирка» нэмпи пос понда. Щимащ пос сахат рахад артадаты, маты кадаң хой педа луңтасман ул.

– Муң ты рупитты Мужи вош элты китсаюв. Ма ветеринарной фельдшера улдам, па Павел Ануфриев – ветеринарной врач. Муңев зоотехник Руслан Нева нётал. Лув там тащдал хоца рупитал, щипан шоши хоятдал луң сус дойты тахайт уятал, – арсыр войт яммалтыты леккар ху Дмитрий Рохтымов ястас. – Муң патан мосты портунат акатсув па Дапатнаңк воша ёхатсув. Щита лавадсаюв. Ай трёкол юкан машина лэптассув па етна пелка Кев педа этсув. Манты юшев Кев дыпи карты юш пуңалта Саран мува манал. Щиты муң 2-мет таща ёхатсув, хота Константин Серасхов бригадира ул. Дойлтыты пушасал лэщатам антом ус. Щипан муң елды мантсув па 3-мет таща ёхатсув. Ши тащан Николай Максаров бригадира понман ул. Лув хоцаед вошамдал лэщатман

усат. Ар хоятан дойлтыты хар, кораль иты, сора версэв. Кимет хатадан, адаң элты, тащэв доңалсэв.

Доңалтам тащэл луңатсэл – тампуш ветсот молтас суюв луң улты мува ёхатмел. Кашң луңтам вой сибирской язва нэмпи муш элты вакцинайн понтса. Шоши войт ищи щимащ портунан донцсайт па палдал посн версайт. Ши щирн лув тал пора ёхаттыйн хорасты тахая маты кадаңдал соращак нэпек щиран лэщатлайт па ши сахат ох митадылда. Кадаң тумпийн, хотан улты ампат ищи бешенство муш элты уколтан донцсайт па сул-войт элты портунан дапатсайт.

Хулмет тащан рупитты етшам юпийн, леккарат нядмет тащ педа мантсат. Щита ищи кадаң тащ луңатсэл па войдал портунан понтсалдал. Там да-



Хор: Иван Сандрин

Арсыр войт яммалтыты леккар ху Дмитрий Рохтымов кораль верты нётал.

патан олаңмет таща яңхлат. Кимет дапатан па хащам тащан рупитты питлат.



Хор: Иван Сандрин

Дапат емаң тор вой туса

Тор войт йис тэдан Лорвош район муван тыхалдал верылыдат. Хантэтан ши вой емаңа тайда. Лув педаел пойкащда па кетамты ант эсалда. Мир доватан ши тохлаң войт шимда йиты питас, щипан «Вурты нэпек» хоца ханшман ул. Ин хоятатан нэман энмалтыты питсайт.

Ущ тылащ 24-мет хатадан Лорвош район Кунават мува дапат тор вой пошах туса. Щита лув унт дыпийн улты кал лотата эсалсайт. Одаң сус лув каматса хатл вошам элты лэщатам кораль дыпийн усат, еша утадсат.

– Кат нэ вой па вет ху тор пошхат кимет хатадан ким

эсалсалдув па лув вердал сахат самең кал лотат кутан лэвман шушидыты мантсат. Улты мувед вантыман яңхты питсат, – ЯНАО департаментан природной ресурсат па экология хоца рупитты ху Дмитрий Замятин ястас. – Лув холна анта шеңк



Хор: vk.com/trvmujitr

унат, ведщи кат тал довата йисат. Вет-дапат тал доватан пошхат туты питдат. Там емаң войт хув улдат, хойтат ветъяң тал унты. Щипан нумаслам, ты эслам торлув ёхлы ищи-па ёхтыдыты питдат па тата тыхалдал вердат.

Ши пошхат Рязанской область Окской нэмпи заповедни-кан сэма питсат. Сэма питтыйн, пундал охсар хорпи вуртэт. Энамтыйн, айнайн пундал новия йиты питлат па тохал тайдал питыя йилат.

Мет одаң тор пошхат 2009-мет талдан эслысайт. Щалта па 2012-мет талдан. Хон мувед куца ху Владимир Путин тор войт пидан Кунават мув хуват пурдыман яңхас. Хащам пуш 2019-мет талдан каматса пошах тутдыса. Аратад Куноватской заказник хоца хольмаң педа хулам тор вой пошхат эсалман улдат. Елды па 2031-мет тал унты там муван 50-кем тор войт эсалты артадалат.

Иван Сандрин ханшам потардан

Тэк куртан ай леккар нэ рупитал

Там ванан Суматвош район Тэк курта яңхмеман ма нумадмасэм, тунял тохи Ишим вош элты ай леккар нэ Валерия Игоревна Фалькова рупитты ёхтас. Ма дув пилэдан уйтантысам па мосты верат элты потарсам. Дув Ишим вошан сэма питас, щита энмас, вошаң медколледжан ай леккара уталтыйс. Интернет мохты рупата каншмадан, дув оша пайтас, Суматвош район Тэк куртан ай леккар мосал.

Валерия мохты Суматвош район леккар хот куца нэңа Екатерина Александровна Сагандуковая карты кед хуват ястас, щита рупитты лаңхал. Щиты 2025-мет тал лыпат хойты тыдащ 3-мет хатл вуш элты Валерия Игоревна Фалькова Тэк куртаң ай леккар хот куца нэңа йис.

Валерия ястас: «Муң ун хот-тэлэван ма – одаңмет леккар нэ. Ашкудайн биология па химия урокдан самаңа тайсам. 9-мет класс етшаптамем порайн ма руц ясаң, математика, биология па химия хуват экзаменат яма масам па медколледжан уталтыты питсам. Щита уталтыты щира ма арсыр даварт отат вантсам, туп так номас масам – ай леккара йилам, мира нётты питдам. Елды, мосаң, мединститута уталтыты мандам.

Тый рупитты ёхатмеман ма «Земской фельдшер» постапса щирн йи миллион солкува ох ёша вусам, вет тал рупитты мосал. Манэма тата умащ улты па рупитты, мосаң, елды уталтыты питдам па тата рупитты па улты хашдам».

Ин там Тэк куртан ай леккар хот – щит щимащ хот: йи пелкан леккар хот ят, кимет пелкан – леккар нэ улты-холты хот ят, щита Валерия Игоревна ул. Дув ястас, тал порайн нэман хошмалты щуңк пилан щита яма ус.

Леккар хотан хулам хоят рупитал: Валерия Игоревна Фалькова, Любовь Михайловна Кузнецова па Вера Иосифовна Козловская. Елды куца нэ ястас:

– Ай леккар хотэв Суматвош район ун леккар хот хоца луңтасал. Тэк куртэва Пукар па Устрём куртан лоңман улдаңан. Ияха луңатты ки, муң хоцаев 356 хоят ул, щи кутан аршак ханты мир. Муң мосты порайн няврэмата па ун хоятата

арсыр прививкайт пондув. Ин Суматвош районэван клещ хомлах тыйс, щипан там тал пора вуш элты куртаң мирэва нэман прививка донщтаты питлув.

Ванты, муң ищки муван улдув, щипан тал порайн ар хоят венш понямдал ищкийн вуциладайт па ёшлад-курдал потыдыдайт. Ям, кушкепа там тал куртаң мирэв ковид мушан ант мушитсат. Щи тумпийн тата ар уна ювам хоят ул, щипан сам муш тайдат, потам худ дэлат па хон лэр мушан ёхатлайт.

Няврэмат пилан рупитты ёх луң-сус порайн Суматвош район леккар хота яңхлат, мосты анализат малат, дув арсыр леккар хоятатан яма вантлайт. Уна пелка ювам ёх диспансеризация щира район леккар хота китдалдув.

Тата, ванты, ар пелак худ па вой велпаслаты ёх улдат, щипан тухал ишн даварт верат улдылат. Йи пуш етан карты кед хуват потарса – хатнэху няр нюлмал элты хув сус вур йил, муң муй верытсус, иса версус, вурал манты ант волдыйс. Санитарной тохлаң хоп ат вохсус. Щалта велпас ху район леккар хота китсус.

Йи нуша ул – яңхты машина ант тайлув, порайн куртаң икет муңев тутдыты вохлув. Ин район леккар хот куца нэңев тал порайн муңев машина маты номас тайл.

Валерия Игоревна елды потартас, ешаул дув хоцаел «Святитель Лука» нэмпии мир яммалты ялап тутаң хоп ёхатал. Леккар хоятат лыпат энамты тыдащ 24-мет хаталан Пукар куртан, 25-мет хаталан – Устрём куртан, 26–30-мет хатлатан Тэк куртан мир вантты питдат. Сусан «Николай Пиров» тутаң хоп ёхатал – лыпат хойты тыдащ 17-мет хаталан Пукар куртан, 18-мет – Устрём куртан па 19–22-мет хатлатан Тэк куртан леккар хоятат мир вантман рупитты питдат. Ропхаң курк тыдащан Суматвош район леккар хот элты волаң леккар нэ ёхтыдыйс.

Там уталтыты тал порайн Тэк куртаң леккарат ашкудая яңхсат па няврэмата тумтака улты па мир яммалты рупата элты айкед тусат. Ин там тал 9-мет класс етшаптам йи эви елды номас тайл Ёмвош меди-

цинской колледжа уталтыты манты.

Айдаг леккар нэ элты инщасам, там ханты куртан, ал па ялап пилнэңат, духсат пилан уйтантысан? Ёхды ястас:

– Па муй. Ма тый йиты елдийн, япсыена нумассам, муй хорпи там Овс мув, муйсыр шоши мир тата ул. Щикуш ищки мув, туп тал порайн манэма тата ям улты ус. Ялап пилнэңат па духсат тайты питсам. Ин луңан щутщаты хатлатан хопан худ велпаслаты тутдыдаим – шеңк хорамаң мув, эплаң худат па вуды нэхи. Туп васы-лунт нэхи холна ант дэсам. Шоши мир, хантэт па охалят – шеңк самаңат, мосты вератан иса нётлат.

Людмила Шульгина
ханшам потар



Хор: Людмила Шульгина



Хор: Людмила Шульгина



Хор: Людмила Шульгина

Волаң нётапса туты ханты нэ

(Олаң шупал № 26 лүңталн)

Нётты хоятат

Удты тахаед ляль манты хар унты хутъяң километрайн ус. Си леккар хот «Яңмет атэд леккар батальон» (Десятый отдельный медицинский батальон) нэм тайл. Лув дапат, тыдась сис тата дойты верытдат. Си юпийн мохты актасыты па па тахая касалты мосал. Си едпийн сита онкология леккар хот ус, лосытыты лэсытыса. Ляль питмадан, хот мосты ураңан, пуншса. Худам хатл сис лэсытса. Хот доңал, хот ятат, хотхар тайл, муй холна мосал, хоятат ямалдыты рахал.

Хоты сита вер манал, яңхам нэцев ситы ястас: «Хоты ляль манал, ныда: иса пусаң, пошкан сыйт щацлат, дронат кашң хатл эсалдайт. Туп Волаң Ляля постама хатадан иса машья ус. Сита удты хоятат си вер педа уталман удлат, туп давалдат. Молты ки питад, мохты ханятыты тахая мандат.

Хон мув ар вошат эдты леккарат ёхтыдыдат, контракт сирн рупитдат. Ар пелак сита Сахалин, Чукотка, Якутия эдты рупитты хоятат усат. Ма нумастэман, шоши мир хоятат самдал мет лэпатшакат, хоятата мохты нётты йидат.

Хон мув ар тахайт эдты нётты хоятат ёхтыдыдат. Социальной сеть хося атэд группа тайлат. Сита ханшман ул, муй мосал, хой муй верты питад. Муң удмев порайн, Турам хот эдты хоятат ёхтыдысат. Хон мувев эдты симась хотатан рупитты хоятат хол дув кутладан пидтасыман удлат. Кашң дапат группайт акатдайт па ляль манты харата нётты китдайт. Муң удмев порайн, си хоятат хотхар лөхитман усат па хоятат пидан потрэмисат. Муң нийд сёсан тохи ёхтыдысув, сита иса сыстам ус. Лув алаңсахат унты иса лөхитсат.

Ляль хар эдты тутдыты хоятат кутан, шеңк ар давартаң отат удлат. Леккаратан, хой ёш-кур ант тайл, довлал туңасира лэсытдайт, дыпи сулдал, муйдал иса яха акатдайт, ёнтдайт па шеңк даварт хоятат Москва па па вош леккар хотата китдайт. Тата туп антом шеңк даварта мушмалтам ёх хасыдат. Дапаткем леккар хотан удлат па па ляль хара китдайт.

Ар пелак ёх нэпеклад тутан ёсамат, ситлад лэсытсув. Хой курладан яңхты ант верытал, хот ятат кутан леккарат хося па рентген верты тутдысдув. Симась рупата версув.

Тохи ёхтыдыты хоятат хол нэман мадайт. Ма «Овс мув» нэм тайсам. Туп думатты сохе-ман «Ямал» ханшапса



Мargarита Петровна си ёнтты машинан ляль харан удты хоятат мосты сохан ёнтсалды.

Хор: Margarита Вегголенко

(логотип) лэсытман ус. Нэман симась сохан яңхсам. Нумассам, мосаң округ, ханты хоятлүван шиялалайм. Йи хатадан ай русь няврэмиеман инсяссайм: «Нын Ямал мув эдты?» Ма ястасам, округев эдты ёхатсам. Лув Ямал мув Ноябрьск вош эдты ус. Манэм ападмасды, матты ки ван хоятқан. Сита ападматы, потарты



Хор: Margarита Вегголенко



Хор: Margarита Вегголенко

ант рахал, иса вантман тайсаюв. Мосаң молты нэман китам хоят ёхтас. Похие антом шеңк мушмалман ус. Кимет хатадан ёхатсам, лув па антом. Аходта туса, нэмад па ант инсяссэм. Хой манэм си сохан шияладды, ястал: «Ма нын округ хоят пидан ляль харан усам». Саменан мохты амат, хоятлүв яма лялясдат. Сялта па нумасдан, мушмалтам хоятлүв ант вантсалдам, сэма ант хойлат, таңха иса ям. Ситы елды ат ул, тумтака ат удлат, Тураман ат шавидайт».

Муй хорпи рупата сита мосмитал

Сита сюсыты кум антом, шеңк ар рупата. Муй иса верты. Тохи ям номасан ёхтыдыты мосал. Мушмалтам ёх аматдат, самладан кеншака йил, нётты хоятат педа вантман. Муй хорпи рупата сита мосмитас, Margarита Петровна ситы ястас: «Ма уйтдам, ханты хоятлүв кашң куртан, вошан сита удты хоятлүва нётлат: ёнтаслат, сэвлат, ар хорпи пормасат китлат. Хой си потар лүңатал, молты пормас киттэд порайн, олты таха лаңкты сохат па ат лэсытлат.

Шеңк ар вур, пусанциты кум антом. Сохлад мохты ел вошқадайт. Холся си арат сох вуты. Хоятат пидан кашң хатл потарты мосас, атом эдты ант ат нумасат. Олаң хатлатан ма леккар нётты йи нэ эдты ястам яснат худсам: «Ал пада, наң ёлан, иса ям питад!» Си юпийн ма па ситы потарты питсам.

Ма мохты нётты питсам. Хун шияласам, олты тахайт лаңкты па лаңкасты сохан ант тарамдайт, мохты лапкайн ёнтасты машина лутсам. Гуманитарной нётапсайт кутан симась сохат па китман усат. Хоятат катра, тохам сохат китлат. Лувилал пирысдам па ядпа ёнтсалам.

Приёмной отделенияйн олаң ятан ёнтасман омассам. Вантсам, муй сохан тутдыым хоятат усат. Реанимация отделение волаң леккара нётты нэ ёх хоятат вантты ёхтыдыйс. Шияласды ма ёнтассам, операцияйн мосты сохат образец мохты тус. Сита муй хорпи размер тайлат, ханшман ус. Имомты хатадан си нэнем аходся катра порайн олты таха лаңкты ялап сохат (простыни, пододеяльники) тус. Ёнтты мосал, шеңк мослат, ястас. Ант сюсыман лувилал ёнтсам. Кат дапат ма урцема, щах шимал ус. Ма ант ишкансыдам. Кашң ханты нэ сита ки ус, ситы нётас лудан».

(Елды 5-мет лопасан лүңталн)

Альбина Тырлина ханшам потар

Волаң нётапса туты ханты нэ



Хор: Маргарита Бягоченко

(Олаң шупал 4-мет лопасан)

СВО ураңан ёнтаслуд

Пулнавт вошан «СВО ураңан ёнтлуд» («Шьём для СВОих») проект хося ханты, ур нэңат пилтасьман улдат. Ляль харан улты хоятлува мосты пормасат ёнтлат. Си вер элты Маргарита Петровна па ясаң верас: «Яха уйтантыгы нэңлуд ляль харан улты хоятлува шеңк нётлат. Ар мосты пормас китсув. Там ёнтасты хошапем лувилала мойдалэм.

Ма тохи яңхсам, вантсам, хоты сита вер манал. Муң тата пормасат, портунат лутлуд, тындад палсямат. Сита пормас лутты кеншак. Лапкайн муй иса ул, туп улты хоятал шимал. Сишан тыныты сохдал, пормасдал, лётотдал тындышак. Муя сикем ун хошапат китты, ох сохпататы. Леккар хота ох китты рахал, муй иса сита лутты верытлат.

Кашң ар пелак мушмалтам хоят катетер тайл. Муң ёнтты кашңлуд лувилала луматты ант верытлайт. Ин ёнтасты нэңлуд пилан дыпи кашат па сирн ёнтлаллуд. Хоят нох дыйты ант верытал, луматты сохал уншак эватты мосал. Силта лувилала луматты сохат образец тусам. Ин си сохат хуват лувилал дэсятлаллуд. Сита улдем порайн, эвилуд симась сохат ёнтсат па китсат. Ма ёхи ёхатсам, лув холна тохи ант ёхатсат. Ин мосаң ёша паятсэл».

Нётапса верты хоятат шеңк мослат

Си леккар хот хулам ятпи. Кашң ятан леккарат, лувилала нётты хоятат йи вош элты рупитлат. Лув атэд нётты хоятат тайлат. Муң нийл хоят усув. Хулмет ятан рупитсув. Сита шеңк даварт хоятат олдат.

Ханты нэңиев холна рупитты хоятлал элты каматса ясаң ястас: «Муң пилана рупитсув. Манэма шеңк ям хоят хойс. Русь ими Тюменской область элты. Ун куся нэңа ул. Ма итаем, муй верты мосас, иса верас, ант ёрасяс.

Муң яң хоят манты верэв ус. Сита хоятат па вантман тайлайт. Каматса хоят ант вуса, сишан ма вохсайм.

Ёхи манты елпийн, леккаратан ин-сяссайм, наң тата елды рупитты лаңхалайн? Ма кашасьсам. Ма си ураңан си тохи мантсам, хоятлува нётты ураңан. Антом ох шитты кеша. Си хоятат элты ма атэд пирысайм. Лув манэм давалты питлат. Хун ханшлайм, мохты манлам.

Сита нётты хоятат шеңк мослат, ёш ант тармал. Ин ма вантсам, уятлам, муй сирн рупатаем туты мосал. Хун Волаң Ляль ус, кашң хоят нётас. Ин па па сирн ляль манал. Ал хоятат лув сирэдан улдат, сита лялясты хоятат – лув сирэдан. Шеңк даварт вантты. Нэңдал

ёхатлат, хорамаңа луматлыман улдат, нэмомлты нётоп ант верлат. Ападматы ёрашлат. Лув па ешад ястаты, вохты ант верытлат, муш ант сясьты портунат, уколлат ант тайлат.

Ёхи ёхатсам, тата улапса па сирн манал. Матты ки антом йи хон мувеван уллуд. Йи хатадан сита пошкан элты шеңк орытсат. Похат муң улты тахаева ёхатсат, парлуд ки, йи тахайн уйтлаюв. Матты ки сита па хоятат улдат, матты ки ляль ант манал.

Ин наң ки нётты хоята (волонтёра) улдан, нэпекан малайн, мосаң па па молты шитлан. Нётты хоят ар питас. Туп каматса пуш ёхатлат па ал антомат. Нэмомлты онтас антом. Кат, хулам хоят, хой кашң пуш ёхтыдыйл, па си. Кусяев Некоча Окоэтто, сикем ям хоят, ун онтас, нётопса верал».

Ма ар ханты хоят уятлам, хой СВО хося улты хоятата волаң нётапса верлат. Хун симась самаң, каркам, вератты хоятат Маргарита Петровна хорпи улдат, ляля нётлат, ляль харан улты хоятлува саман амат па кеншак. Лув уйтлат, рутлалан, нётты хоятатан нётлайт, ант воськалайт, ант ёрэмалайт, ёдан даваллайт.

Маргарита Петровна, тумтака ула. Наң верты верэн, туты рупатаен, ляль харан улты хоятлува шеңк мосал.

Альбина Тырлина ханшам потар

ОБЪЯВЛЕНИЕ

Там QR-код хуват лоңаты па вантаты, муйсыр нётопсайт СВО хоша улты мохета малайт. Шци тумпийн нэңдала, няврэмдала, аңкидала па аңидала ищи нётопса вуты рахал.



ПОЛНАЯ ИНФОРМАЦИЯ ПО ТЕЛЕФОНУ
+7 (902) 816-11-90
+7 (34922) 3-98-08
ЗВОНОК ПО РОССИИ БЕСПЛАТНЫЙ

СЛУЖБА ПО КонтРАКТУ В ВС РФ

ВРЕМЯ ДЛЯ ВАЖНЫХ РЕШЕНИЙ!

КонтРАКТНАЯ СЛУЖБА
6 700 000 Р
ЕДИНОВРЕМЕННАЯ ВЫПЛАТА
4 000 000 Р

ПРИ ЗАКЛЮЧЕНИИ КонтРАКТА НА ЯМЛЕ

Прибывающие из других регионов возмещаются затраты на проезд от места проживания до г. Салехарда. В период оформления проживания в г. Салехарде и 3-разовое питание предоставляется бесплатно.

ОБУЧЕНИЕ:
✓ ОПЕРАТОРОВ БЕСПЛОТНЫХ ЛЕТАТЕЛЬНЫХ АППАРАТОВ
✓ ТАКТИЧЕСКАЯ БОЕВАЯ
✓ МЕДИЦИНСКАЯ ПОДГОТОВКА

3 600 000 Р ЕДИНОВРЕМЕННАЯ ВЫПЛАТА ДО 120 000 Р
400 000 Р ЕДИНОВРЕМЕННАЯ ВЫПЛАТА ДО 120 000 Р

ЕЖЕМЕСЯЧНЫЕ ВЫПЛАТЫ ПРИ НАХОЖДЕНИИ В ЗОНЕ СВО ОТ 225 Т. Р

Сорашак айкед мошлатты ураңан

«Лух Авт» газета кашң лапат йи пуш этлдыйл. Тухал ишан, ёхаттал унты талаң лапат хаңал. Шци веран, сорашак айкедат мошлатты ураңан, нынан мосал «Лух Авт» поныдыты айкедат «ВКонтакте» па «Одноклассники» хоша мошлатты.

Шци ураңан там QR-код мохты лоңаты, па муң верыдыты айкедлува ханшлтыяты. Кимет веран, айкед луңатты тумпийн, щита рахал ясаң ханшты, потран сама ки рахас – пос понты.

Муң па, нын вантам айкедлан элты ищи нопсэв тыед-тохел поныдылэв, вантлэв – мата айкедат па муй элты хоятат луңатты лаңхалат.

Тумтак ёшна, тумтак курна ханты мир улапсаев ияха понасан елды тулэв, ханты мир ясцев шавилэв!



Шөпэрқи



(Олаң шупал № 26 луңталн)

Мән, мән, әй латнә қота йөвөт. Ту ими... ими төттү. Йәқә ләң.

– Нүң, тәм, қылхәлэм, нүң мүват йөвтән? Тәт қыла нүң, – мөттә.

Чайат уң йәнәлты ту өпилнә, тәтөпилнә. Панә һавмәл:

– Нүң төм пайләх, қылхәлэм, йәм нә тәйлән?

– А, тәйәм, – мөттә.

– Өс ту нә қөты йәх?

– Әй ту аңкәлэмнә илә пүтәпты. Панә ма, – мөттә, – лүват кәнчләм.

– А, – мөттә, – ма вәлә әнтә вуләм, нүңат мүвәлийат памтәптахә.

Сарнам мәнә. Күтәп тәтөпә вәлл. Ма па вәрам лүвнә мәшмәта йасәңат йастәли, йәм мәта.

Панә пыр қәтәл сарнам мән. Ти мән, мән. Нөмәлта қөсәт лүватынам ләйәлләт. Панә қулмәлтахә нөмәқсәл. Йухат ләйләхәл: «Йа, тәқа, ылә қулмәхтәләм. Ма ит тәхәнә нөмән йәңқилләм, өс тәл илә лирты питтә нәңи пәқи, пәв пәқи ешә йәңқиләл, йөвин». Қолтә йухат ләйләхәлтәлнә, тәми моқи қунтта йух тувәм тохи. Өс сарнам мән, мән. Моқи олнә пә тәл йух туви. Өс сарнам мән, мән. Өс тәм олнә йух туви. Панә төт сарнә вәх ләккә, кәв ләккә йәл. Итпә қөчәхләх. Панә ту ләки мән. Мән, мән. Туминт қота йөвөт. Ту қотнә... ту йәқәләң.

– Қылхәлэм, нүң, – мөттә, – қылхәлэм, пәта вәла! Ма нүң тәтөпә вөсәм.

Чайат уң йәнәлтәтәх, литәтат липәттәх. Панә ту тәтөпилнә пырили:

– Нүң тәқа, қылхәлэм, төңкә йәм нә тәйлән?

– А, йәм нә тәйәм, – мөттә.

– Өс, – мөттә, – ту нә қөты йәх?

– Әтә аңкәлэмнә илә пүтәпты.

– Ма нүң, – мөттә, – сар, – мөттә, – ма

нүңат... йасәңат йастәтә, мүв шир мәта йасәңат йастәтә қөл әнтә вуләм. Тәт сарнам мәнә. Ай тәтөпә вәлл. Ту тәтөпәнә, мөшәт, мәшмәта өтат йастәлә, йәм мәта кәлат.

Сарнам мән пыр қәтәл. Ту мән, мән. Қөсәт лүванам ләйәлләт, нөмәлта. Панә нөмәқсәхәл: «Ылә қулмәлтәтәхә пә йәм. Ма тәхәнә ит йөвин йәңқилләм, өс тәл илты лирты питтә нәңи пәқи,



Хор: Людмила Айваседа



Хор: Людмила Айваседа

пәв пәқи па йәңқиләл, йөвин». Панә ту ләйләхәлтәлнә, тәми йух аңкәләт. Моқи қунтта йух тувәм тохи. Панә сарнам мән, мән. Моқи олнә тәл туви. Өс сарнам мән, мән: та тәм олнә йух туви. Панә төл сарнам вәх ләк, кәв ләккә йәх. Ту ләки

ныңә.

Әй ту пыр қәтәла йәх. Пыр қәтәлнә, әй мәта латнә қәтәл йәчә мәта кима йөвтәма, қөтәң әләхтахә тө йәх. Панә ту нәнам йастәл:

– Нүң қөйәхи тәт тәйлән? Қәнтәқ қө әпәл.

– Ма мәта тәт қөйәхи әнтә тәйләм. Атәләмнам вәлләм.

– Әнта, чайә йастә, қөйәхи нүң тәйлән тәт?

– Қөйәхәмнә йөвөтлөйәм? Ма тәм атәләмнам тәт вәлләм.

Панә қөләмпа мәхәлты ләләх, әй ту арит қәнтәқ қө әпәл. Ту тәтөпил йастәл:

– Тәқа, әй мәта қәнтәқ қө пә әнтәм. Ма тәт атәләмнам вәлләм.

Панә қөтәң әвәл ту ими, ти ылә вихәл, нәврәмәх, қот ләхпийә.

(Еллы па ул)

Аграфена Сопочина нэпека ханшсаллы




Хор: Людмила Айваседа

Емаң тутцаң

(Олаң шупал № 26 луңталн)

Ин ун аңкелан уталтаты партам арал арыты питсалды па тухал ясаңдал холты ёрэмасды. Сора, сора ёшал хир дыпия эсалсалды па кат сорама кепал эпа талас. Сэмдал уна сухтаман, ун аңкел педа керлас. Ун имев па няхал ханятман, эвел педа ястас:

– Потар-арэн яма ант уталтасэн па ван-та муй тыйс. Щалта па кашң вер хоца



Хор: Иван Сандрин

щиты? Муя ант щакдан, рупатаен патэл унты туты ант верытлэн. Ям пормас лаңхалайн ки, рупатаен яма верты мосал. Кепалдан лэпта таталдан ки, тус ёлан ёнтасты питдан ки, тутцаёнан хорамаң пормасан мадайн. Муйкем сорамак ёнтасты уталтыты питцадан, наёен аршак молты алыты кум шитдам. Там талэн хащал, сахен па ая йил, хойн ялап сахан ёнтдайн.

Эви хилы машъяйн хотал элты ким этас. Ёхан питар па пад рэп хоца ёхтас, ид омпсас. Нумасал. Ешаул хотал педа ёхлы щи хухалмас. Ун аңкел педа ястал:

– Уң аңки, ма оша пайтсэм, муй верты мосал. Ма тутцаёма ун кеплат пондам, лув па манэм хорам сохат ёхлы мал.

Талаң лапат эвев ёнтты ким ант яңхас. Кашң хатл татласас, ётлащас. Юр понман ешащтал элты шаңкыйиңка дылдас. Пора хащам юпийн, вай ёнтты кепал тэл тутцаң хырада щи понас.

Ин метам эвев етан алаң ид войпса. Ун аңкел аялта ид ханятам вайаңдал эпа талсалды па тутцаң хырада понтсалды. Тащ татдам, лэпат кепалдал па нох вуслы.

Алаңсахат хилыел туп нох верлас, мохты тутцааңал валэмасды. Хорам вайаңан кашаламан, шеңк нох амтас. Ин эвиев емаң потар-арал яма уталтасды па ант тахрамты-ман ястаты верытсалды. Арал арыты кут ёшңалад па рупитлаңан.



Хор: Иван Сандрин

Ун аңкелан емаң тутцааңал па щи ват ухла ид понтса. Эвем энамты сыс, еша щита ат одал, нумасыйл. Хув, муй ван пора хащас. Ин ай хилыел ун хорасаң эвия энмас. Ёнтасты па верантты тус ёшаң нёңа йис. Емаң тутцааңал лув ёшңаладан ёнтам арсыр хорам пормас иса тайс.

Зоя Куртямова нэпека лэщатсалды

Ими Хилы па Ялань пошах

Ими Хилы имайл пилан ул-лаңан. Ими Хилы ай рэпие верас па щита хататдыйл.

Йи пуш имайл хоца ёхтас па ястал:

– Имайе, ма амуй войие ун-тан вантсам: дыйл путы, лув па хопшат. Щит па муй войие?

Имайл ястал:

– Щит лаңки, хилые. Кат-ра наң ащен щимащ войиет велдыйс.

– Мандам ма, щи вой велдэм, – Ими Хилы ястал:

– Наң, хилые, хонна ай. Наң лув юпелан хухалмадан, лув па юха нох хуңхал. Муй наң верты питдан?

Ими Хилы па щи хататдыты манас. Хув-ван хататдыйс, па щи имайл хоца ёхтас па инщасал:

– Имайе, ма па щи амуй вой вантсам: иса путы. Щит па амуй вой?

Имайл ястал:

– Щит, хилые, нёхас. Катра наң ащен щимащ войт ищи моцатыйс.

– Мандам па лувел нюхал-лэм.

– Хун наң нёхас нюхалты верытлэн. Нёхас щит хув дыйң войие.

– Имайе, хоты щи вой мо-щатты рахал?

– Хоты моцатты? Юхал па нёдат юран.

– Щит муй щирани юхал па нёдат? Хоты юхал па нёдат вер-ты рахал? Имайе, вера манэм юхал па нёдат.

Ими Хилы юхалад па нёдатан имайелан щи верса.

Алаңсахат имайл нох килас, хилэл па ёлан антом.

Ван муй хув Ими Хилы унт

хуват яңхас па ёхи ёхтас. Вой тэдыя тус. Ими Хилы имайелан лапатса-йинщалтаса. Щалта дын вой сохат лэщатты омассаңан. Имайелан Ими Хилы уталтада, хоты вой сох лэщатты мосал.

Щи хатл элты Ими Хилы вой велты яңхты питас. Кашң алаң унта манал. Имолты порайн имайел педа ястас:

– Имайе, ма ин унта елдышак яңхты питлам. Щита вой тэдыя.

– Щиты щи.

Имайел омпсас па хилэл ураңан лэотот поныдыты ай хи-рые ёнтас.

Кимет хатадан Ими Хилы унта па щи манас. Вой калмат хуват шушал: лэңкар калтам ки уятал, щи калтам хуват шушал, шовар калтам ки уятал, шовар калтам хуват шушал. Щиты шуштал ху-ват хулантал: ахой щикем увад. «Мандам, вантлэм, ахой щита увад?» – Ими Хилы нумасал.

(Елды па ул)

Любовь Возелова нэпека лэщатам монц



Хор: Любовь Возелова

Ашкудайн уталтыты суняң пораел етшас

Округ хуват яртыяңмет, ихосьяңмет классатан уталтытым ныврэмат ашкудайн уталтыты сысэд етшас. Эвет па похат экзаменат масат па «Выпускной емаң хатл» там сютсюты хатадан постасат.

Ущ тыдась хольмаң педа лапатмет хатадан Пулцават вош ашкудаятан ихосьяңмет класс етшам ныврэмат «Геолог» харан яха актыдысайт. Си елши хатадан лув ашкуда етшам нэпекат ёша пайтсат.

Муй кем ертаң хатл ус, хорам эвет па похат классной хоятлад пидан вурты юш хуват шушсат. Экзамен мийм порайн, сот балл шитам, «вурты нэпека» ашкуда етшам, олимпиадаятан, касты па па тахаятан яма лувидал эталтытым ныврэмат нэмлад ястасайт, ишакты нэпекатан постасайт па мойлаптасайт.

Етан, айдат ёх уталтаты хоятлад па аңкидал-асидал пидан уталтыты пора сысэд постасат. Айшукые сютсютат па ар тахаята елды уталтыты лакки мандат.

Там лопасан аттестатат мийм па «Выпускной емаң хатл» манам порайн верам хорат лэсятсув.

Альбина Тырлина ханшам потар



Хор: Альбина Тырлина

Хор: Альбина Тырлина



Хор: Альбина Тырлина

Хор: Альбина Тырлина

Газета «ЛУХ АВТ»

Адрес редакции:
629003, ЯНАО,
г.Салехард,
мкр. Богдана Кнунянца,
д. 1, каб. 106
+7 (34922) 4-68-63

E-mail:
luh.avt@yamal-media.ru

Учредитель

Департамент внутренней политики
Ямало-Ненецкого автономного округа
(629008, ЯНАО, г.Салехард, пр-кт Молодёжи,
д. 9, каб. 708)

Газета зарегистрирована

Управлением федеральной службы по надзору
в сфере связи, информационных технологий
и массовых коммуникаций по Тюменской
области, ХМАО-Югре и ЯНАО
19 апреля 2012 года
Регистрационный ПИ № ТУ72-00558

Тираж 1300 Заказ 229 тз
Подписные индексы:
на год – ПА700, на полугодие – ПР561

№ 27 (1330)

Газета вышла в свет 4 июля 2026г.
Подписано в печать 2 июля 2026г.
по графику: 16.00
фактически: 16.00

Газета выходит по субботам

Цена годовой подписки 88 руб.,
в розницу не распространяется

Издатель

Департамент внутренней политики ЯНАО
(629008, ЯНАО, г.Салехард,
пр-кт Молодёжи, д. 9, каб. 708)

Отпечатано в АНО «Ямал-Медиа»
Юридический адрес: 629003, Ямало-
Ненецкий автономный округ, г. Салехард,
мкр. Богдана Кнунянца, д. 1, каб. 106

Фактический адрес: 629007, Ямало-
Ненецкий автономный округ, г. Салехард,
ул. Чубынина, д. 39А

Генеральный
директор
АНО «Ямал-Медиа»
Зулинова
Марья Андреевна

И. о. главного редактора
Сандрин
Иван Эдуардович